

Date – 17/07/2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram Truck Owners' Association chuan kawng chhia avangin lirthei tlan tir aiin din tir a hlawk zawk tia an lirthei din tir an tam tawh tih a sawi.
2. Hmeichhe naupang chawikanna turin Beti bachao beti padhao chu Lungleiah Social Welfare Deptt hnuaiah Women & Child Deptt chuan uar takin a kalpui chho mek.
3. Union Cabinet chuan thlai thar ti pung turin Prime Minister Dhan-Dhaanya Krishi Yojana a pawm.
4. National Human Rights Commission chuan Bihar-a chhungkaw member panga dawithil tia puh avanga halhlum chungchang chhui chiang turin Bihar Chief Secretary leh DGP te a hriattir.

<><><>

MTOA

Mizoram Truck Owners' Association General Secretary Pu Dina Tlau chuan kawng chhia avangin lirthei tlan tir aiin din tir a hlawk zawk tia an lirthei din tir an tam tawh tih a sawi.

Akashvani in a kawmnaah he thu hi sawiin Pu Dina Tlau chuan Mizoram chak lakna kawngpui, Sairang leh Kawnpui inkar chu tha lai a awm meuh lo tih sawiin Sairang pelh hret, Buichali nena inkar chu a chhiat zual thu a sawi a. Lei pawp leh rod lawr thlenga a awm thu leh heng hian an lirthei ke a tih puah nasat thu a sawi a. Kawng chhia avanga traffic jam a nasat thin thu sawiin zinga driver te chhuk thla chu nileng a tangin zanah an tlaivar thin thu leh a tuk tlaiah an chhuah theih tawh thin thu a sawi ani.

Kawng siam hi NHIDCL atangin a hminga mi tlem azawng an awm ve nia an hriat thu sawiin hna a sawt lo hle a ti a. Phai atanga bungraw lut tur pawh a luh hleihtheih loh thu a sawi a ni.

Pu Dina Tlau chuan tun maiah chuan kawng siam hna thawktu NHIDCL an ngaihchan thu a sawi a, kartawp lamah a hmuna kal an tum thu sawiin an kalchilh chuan kawng siam hna pawh a sawt deuh thina an hriat thu a sawi a ni.



LADC

Lai Autonomous District Council-a sorkarna siam chungchang nimin khan High Court chuan ngaihtuahin thutlukna a la siam lova, karleh Nilaini July 23, ah ngaihtuah leh turin a dah.

ZPM Sorkara CEM Pu V.Zirsanga chuan CEM atanga paih a nihdan ah dan palzutna a awm ni a hriain, dikna humhim a nihtheih nan hma la turin High Court ah a thlen a, Gauhati High Court, Aizawl Bench chuan he thu hi kumin May 15, June 10 leh nimin khan a ngaihtuah a, thutlukna a la siam lo a ni..

High Court thukallai a awm vangin LADC ah hian Sorkar mumal a kalthei lova, tuna CEM nilai Pu N.Zangura pawh hna thawk theilovin dah mek a ni.

LADC a Chief Executive Member lo ni tawh, tuna ZPM, MDC nilai Pu V.Zirsanga hi kumin February 27 khan CEM atan lakluh a ni a, a kaihhruai LADC a ZPM Sorkar chuan Budget Session pawh kumin April 17 atanga 22 chhung khan neiin, Budget pawh passed a ni a, Budget erawh dan kalh a passed ni a sawiin Governor in a pawmlo a.

Hemi hnu hian BJP leh MNF ten an din United Democratic Alliance chuan LADC ah Sorkarna an siamthei tih Governor hnena an thlen a, an hruaitu M.Kawnpui bialtu MDC, BJP hruaitu Pu N.Zangura chu kumin May 8 khan CEM atan lakluh a ni.

Dan pangngai ang chuan LADC ah hian kumin kumtawp hian Inthlanpui neih a ni ang.



SAMVIDHAN HATYA DIWAS 2025

Samvidhan Hatya Diwas 2025 pualin nimin khan Khawzawla hmun thlan chhuah hrang hrangah milem leh thuziak tarchhuah a ni.

Khawzawl veng thlanchhuah pali - Taidawnkawn, Zuchhip, Dinthar leh Vengthar kawnah te SDC Pu R. Lalrinhlua kaihhruaiin Samvidhan Hatya Diwas pualin exhibition atan mipuite hmuh theih turin poster leh banner te tarchhuah a ni a. He hun hi mipuite inzirtirna leh inhrilhhriat tharna atana neih a nih angin mipuiten kum 1975-a India rama emergency puanin a nghawng chhuah hrang hrangte, India ram danpui tihbawrhanna champha hriatrengna atan hman a ni.

Veng hrang hrangah mipuite hmuh theihin thuziak phochhuah a nih hnuah banner te hi DC office tualah tarchhuah leh a ni a. Samvidhan Hatya Diwas-in a awh hun chhung July ni 25 thleng tarchhuah a ni ang.



BETI BACHAO BETI PADHAO

Hmeichhe naupang humhalhna leh lehkha zirtirna kawng a Central Sorkar hmalakna ‘Beti bachao beti padhao’ chu Lungleiah pawh Social Welfare Deptt hnuaiah Women & Child Deptt chuan uar takin an kalpui chho mek a.

He an hmalakna atan hian Hmeichhe naupang te dinhmun humhalhna lam hawiin School naupang zingah inelna hrang hrang, Slogan, lemziak, Reels in siamsiak, Essay in ziahsiaak te an buatsaih thin a, lawmman te pawh siamsak thin an ni.

Hetihrial hian hmeichhe naupang School kallo te pawh zawng chhuakin ei an zawn theihna tur leh mi pangngai anga an awm theih nan hmalak puin Rural Development Deptt hnuaiah puanthui te an zirtir a, Civil Hospital Lungleiah te pawh Youth Clinic te neihpuin hetah hian Body Mass Index (BMI), thi neih chungchang te leh hmeichhiat mipatna hman hma lutuk a that loh zia te an zirtir thin a, a tlangpuin mi 15 vel an kal thin niin thawktu te chuan an sawi. Heng mi te hi Kasturba Gandhi Balika Vidhyalaya(KGBV) hnuaiah Hostel te din anih angin a thlawnin ei leh in,silhfen te pe a enkawl mek an ni.

Lunglei W&CD hian Child Marriage Prohibition Act chungchangah pawh Awareness Campaign kalpuin Sikul leh College bakah Kohhran thalai fellowship naah te hun an hmang thin a, mipa chuan kum 21a tlin hma chuan nupui neih phal a nih loh thu leh hmeichhia pawh pasal nei turin kum 18 a tlin a ngai tih te an zirtir thin a, Inneih tum, engkim ti fel vek tawh, mahse mipa zawk kum a la tlin loh avanga Inneih hun sawn te pawh an zirtirna tang hian an awm tih an sawi.

Heibakah hian PMMVY nau nei tanpuina pek theih dan leh Protection of Women from Domestic Violence (PWD) Act te pawh mipui zingah awarensss kalpuin Auto rickshaw, thingpui dawr, Sobji Bazar leh Office mipuin an dawr tam bikna bangah te zirtirna an tar a, PWD Act bik hi tunkar chho hian uar leh zual a kalpui an tum tih K. Lalrinawmi, Dist.Mission Co-Ordinator chuan a sawi.

<><><>

CHAMPHAI

Mizorama leilet zau ber Champhai Leilet zawlah buh phun runpui zovin loneitu tam zawkin buh an phun zo tawh a, kumin ah May leh June thla chhung khan buhphun tur Buhchi an dah a, hetihlai hian tui harsatna avangin Buhchi dah hun pangngai a dah theilo tamtak an awm bawk.

Champhaia kan corr sawi danin, tunah hian Buh hi a tamzawkin an phun tawh a, tuilianin Champhai zawl zau tak a chim avangin loneitu thenkhat chuan buh hi a hun takah an phun thei lo a ni.

Champhai Leilet zawlah hian Phai nei thenkhatte chuan tui harsat avangin Leihnuai tui pump chhuakin Buh hi an phun bawk a, kum dang aiin

hlawhfa man, Buhphun leh Buhchi pawh man pawh sang zawkin Buhphun in cheng 600 an hlawh thin a, Buhchi pawtin cheng 800 atang 1200 an hlawh thin bawk a ni.

Hetihlai hian Hnahlan kiang, Tiau lui kama Laili phai ah pawh mi tam zawkin buh an phun tawh a, Tiau lui kam tho, Ngur khaw rama Zilhri phaiah chuan loneitu tam zawkin buhchi a la tet deuh avangin buh an la phun thei lova, Zokhawthar bul leh Bulfekzawl leilet ah chuan loneitu tam zawkin buh hi an phun zo tawh a, Vaphai bul, Saikhumphaiyah erawh, boruak tha lo tun hnaiah a thlen thin avang leh an tuilakna, tuikawng a chhiat avangin loneituten an duh angin hma an la chak thei lo a, mi tam zawkin buh an la phun thei lo ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

UNION CABINET ON PM DDKY

Union Cabinet chuan thlai thar ti pung turin Prime Minister Dhan-Dhaanya Krishi Yojana a pawm. He scheme hian a tum ber chu thlai chin tihpun leh loneih dan daih rei zawk thlente, thlai thar dahthatna turte, thlai chinna hmuna tui pekna tihchangtlun leh loneitute tana sum hman tur tam zawk siamte a ni a.

New Delhi-ah chanchinbumite kawmin Union Information and Broadcasting Minister Ashwini Vaishnaw chuan he scheme atan hian district 100 thlan chhuah an ni ang a ti a. An thlan dan turah hian thlai thar tam harsatna lai te, leilung chhia leh sum leh pai lama harsatna laite an thlang dawn a ti a. He scheme hnuaiah hian tuna scheme awm sa 36 lai chhunkhawm tur niin heng scheme te hi department 11 in an kalpui lai a ni a. Heng bakah hian state scheme kallai te pawh huam tur a ni ang a ti a. Ram chhunga loneitu vaibelchhe 1 leh nuai 70 chuangin a hlawkna an tel dawn niin Union Minister Vaishnaw chuan a sawi.

<><><>

BIHAR

National Human Rights Commission chuan Bihar-a chhungkaw member panga dawithil tia puh avanga halhlum chungchang chhui Chiang turin Bihar Chief Secretary leh DGP te a hriattir. Thudawn danin he thil thlenna hmun hi Purnia niin NHRC chuan sawrkar lam thuneitute chu he thilthleng hi chhui Chiang a, kar hnih hnua an thil hmuhchhuahte thehlut turin a hriattir a. Chanchinthar lama

an thehdarh dan a dik anih chuan mihring dikna chanvo palzutna
nasa tak a awm tih NHRC chuan a sawi bawk a ni.

<><><>